

AUÑIÓS

Nº 21

MAIO 2016



ASOCIACION CULTURAL

Pineiróns



O GROVE, ESA GRANDE VILA MECA

Por: Redacción

A medida que esta revista ía crescendo comprobamos que, ao igual que a nosa querida Illa de Ons, o Grove ofrecía un importante número de peculiaridades históricas, etnográficas, antropolóxicas, sociais,..., que había que dar a coñecer pero que, por desgraza, moi pouco ou nada se investigara ou escribira sobre elas.

Foi entón cando decidimos que O Grove fóra outro dos nosos principais obxectivos, poñendo en valor a interesante cultura grovense e así foi que contactamos con persoas do mundo cultural meco para encher de contido esa grande falta.



O mundo da pesca e da conserva en O Grove, cantas cousas nos poden contar.

Contamos, nun primeiro intre, coa inestimable axuda de Jose Miguel Besada e Xohán Fuentes que, por esas causas do destino, nos abandonaron demasiado cedo, pero o seu legado quedou plasmado nesta revista. Eles escribiron e puxéronnos en contacto con outras persoas mecas que foron aportando moita luz a esta escuridade cultural, e así xurdiron Javier Fernández, Francisco Meis, Xan Caneda, Eduardo e Miguel Parada, Luís Rei (QED), Moncho Lavandeiro, Lolita Aguín, Pepe Taboada, Cosme Romai, Abaham Padín,..., e moitos outros grovenses que, aínda non escribindo, si nos axudaron na procura de datos e postas en común.

Pero tamén sobre O Grove e a Ría de Arousa escribiron outros articulistas non nados nesta fermosa vila e así contamos con excelentes artigos de Lino Pazos, Estanislao F. de la Cigoña, Cabeza Quiles, Calo Lourido, Ferrer Jureguizar, Manuel Chazo,... Coas súas colaboracións axudaron a coñecer un pouco máis a historia e a etnografía da vila meca.

Non podemos esquecernos neste repaso aos pequenos colaboradores que están a facer posible este novo rexurdir cultural e aquí tivemos as achegas feitas polos colexios Bizocas, Conminiño e Rosalía de Castro que nos descubriron os traballos dos seus avós, deron un primeiro repaso as muíños de San Vicente, traballaron as chatas mecas,..., e aportaron fotografías antigas dos álbums familiares.

Dende estas humildes letras queremos animar a todos os grovenses a escribir, a contar as historias, contos, lendas que escoitaron dos seus maiores,..., a investigar sobre o seu pobo, a remexer nas



A Illa da Toxa, un universo de lenda.

fotos familiares e contar esa pequena ou gran historia que agocha cada unha,..., a dar a coñecer os antigos aparellos de pesca e de labranza, os cruceiros, os piornos, os fornos, as telleiras, os lavadoiros,..., a pedir axuda institucional para descubrir a vida dos seus antepasados agochada nos castros da vila. As vidas dos seus ilustres habitantes e os non tan ilustres pero que contribuíron, coa súa peculiar vida e feitos, á historia deste pobo

Poñemos esta revista a disposición de todo aquel que queira colaborar aportando os seus traballos en forma de pequenos artigos.



Esas persoas entrañables con tantas historias as súas costas.